

Na osnovu člana IV. 4. a) Ustava Bosne i Hercegovine, Parlamentarna skupština Bosne i Hercegovine, na sjednici Doma naroda, održanoj 26. aprila 2004. godine, i sjednici Predstavničkog doma, održanoj 4. maja 2004. godine, usvojila je

ZAKON O VAŽNOSTI JAVNIH ISPRAVA U BOSNI I HERCEGOVINI

Član 1.

Ovim zakonom uređuje se važnost svih vrsta javnih isprava (u daljem tekstu: javne isprave) u pravnom prometu na cijeloj teritoriji Bosne i Hercegovine.

Član 2.

Javne isprave izdate u Bosni i Hercegovini u svom zaglavlju sadrže, pored naziva Bosna i Hercegovina, i naziv izdavaoca javne isprave.

Kada isprave izdaju nadležni organi i organizacije entiteta, javne isprave u svom zaglavlju sadrže, pored naziva Bosna i Hercegovina, i naziv entiteta.

Član 3.

Pod javnom ispravom, u smislu ovog zakona, smatra se isprava izdata od nadležnih upravnih, sudskih i drugih organa, institucija, organizacija ili drugih pravnih lica u vršenju javnih ovlaštenja iz nadležnosti Bosne i Hercegovine, Federacije Bosne i Hercegovine, Republike Srpske, Brčko Distrikta Bosne i Hercegovine.

Član 4.

Javne isprave, koje su nakon 6. aprila 1992. godine do dana stupanja na snagu ovog zakona u propisanom obliku, po tada važećim propisima, izdali nadležni organi, institucije, organizacije ili druga pravna lica u vršenju javnih ovlaštenja, važe u pravnom prometu na cijeloj teritoriji Bosne i Hercegovine. Ukoliko na izdatoj ispravi ne stoji u zaglavlju naziv: Bosna i Hercegovina, on se može na ispravu naknadno staviti, od strane nadležnog organa.

Takva javna isprava podobna je za ovjeru i nadovjeru u smislu člana 8. ovog zakona.

Član 5.

Ako postoji opravdana sumnja da je javna isprava izdata ili sačinjena suprotno članu 3. ovog zakona, ili se sumnja da je prema licu kojem je javnom ispravom utvrđena kakva obaveza ili uskraćeno kakvo pravo ili povrijeđen pravni interes, pri sastavljanju isprave primijenjena sila, prijetnja ili prevara, utvrđivanje ništavosti takve isprave utvrđuje, na prijedlog tog lica ili drugog zainteresiranog lica, nadležni sud u vanparničnom postupku u roku od godine dana od dana stupanja na snagu ovog zakona.

Član 6.

Javne isprave izdate do 6. aprila 1992. godine od nadležnih organa bivše Socijalističke Federativne Republike Jugoslavije, nadležnih organa njenih bivših socijalističkih republika i autonomnih pokrajina važe na cijeloj teritoriji Bosne i Hercegovine, bez bilo kakvih dodatnih ovjera.

Član 7.

Svi organi uprave, institucije, organizacije i druga pravna lica u Bosni i Hercegovini, Federaciji Bosne i Hercegovine, Republici Srpskoj i Brčko Distriktu Bosne i Hercegovine dužni su uvažiti javne isprave izdate saglasno čl. 2. i 4. ovog zakona.

Ako je u toku postupak po članu 5. ovog zakona, sud koji vodi vanparnični postupak, do donošenja pravosnažne odluke, može suspendirati korištenje prava iz javne isprave koja je predmet postupka iz člana 5. ovog zakona.

Član 8.

Sve javne isprave namijenjene za upotrebu u inozemstvu podliježu ovjeri nadležnih organa Federacije Bosne i Hercegovine, Republike Srpske, Brčko Distrikta Bosne i Hercegovine i nadovjeri od nadležnih institucija Bosne i Hercegovine, saglasno odgovarajućim međunarodnim konvencijama i međunarodnim ugovorima koji obavezuju Bosnu i Hercegovinu.

Ovjera i nadovjera javne isprave vrši se na zahtjev korisnika javne isprave.

Član 9.

Javne isprave, izdate u drugim državama s kojima Bosna i Hercegovina ima zaključene međunarodne ugovore, važe, saglasno tim ugovorima.

Javne isprave, izdate u državama s kojima Bosna i Hercegovina nema zaključene međunarodne ugovore o priznavanju važnosti javnih isprava, važe ukoliko sadrže sve elemente propisane odgovarajućim međunarodnim konvencijama i pod uslovom reciprociteta čije postojanje utvrđuje Ministarstvo pravde Bosne i Hercegovine na osnovu prethodno pribavljenog mišljenja Ministarstva vanjskih poslova Bosne i Hercegovine.

Član 10.

Ovaj zakon stupa na snagu osmog dana od dana objavljivanja u "Službenom glasniku BiH", a objavit će se u službenim glasilima entiteta i Brčko Distrikta Bosne i Hercegovine.

PSBiH broj 31/04, 4. maja 2004. Godine, Sarajevo